



Broj: UP09-07-1-2717/18
Sarajevo, 23.01.2019. godine

Ministarstvo pravde Bosne i Hercegovine, rješavajući Zahtjev Osnivača Udruženja za digitalnu transformaciju u Bosni i Hercegovini, u predmetu, upis u Registar udruženja, na osnovu člana 8. i 33. Zakona o udruženjima i fondacijama Bosne i Hercegovine ("Službeni glasnik BiH", br. 32/01, 42/03, 63/08, 76/11 i 94/16) i člana 4. stav (1) Pravilnika o načinu vođenja registra udruženja i fondacija Bosne i Hercegovine i stranih i međunarodnih udruženja i fondacija i drugih neprofitnih organizacija ("Službeni glasnik BiH", broj: 68/18), donosi

RJEŠENJE

1. U Registar udruženja kod Ministarstva pravde Bosne i Hercegovine, pod registarskim brojem **RU:2250**, knjiga I Registra, sa danom 23.01.2019. godine upisuje se Udruženje pod nazivom:

Udruženje za digitalnu transformaciju u Bosni i Hercegovini
Удружење за дигиталну трансформацију у Босни и Херцеговини
Udruga za digitalnu transformaciju u Bosni i Hercegovini

Udruženje ima naziv na engleskom jeziku koji glasi:
Association for Digital Transformation in Bosnia and Herzegovina

Sjedište Udruženja je: Sarajevo, ulica Skenderija broj 70/III.

2. Udruženje ima svoj znak.
Znak sadrži grafički prikaz digitalnog stabla crne boje, a koji simoblično predstavlja naziv udruženja digitalna transformacija. S desne strane, pored znaka Udruženja, nalazi se i natpis: Udruženje za digitalnu transformaciju u Bosni i Hercegovini.
3. Danom upisa u Registar udruženja kod Ministarstva pravde Bosne i Hercegovine, Udruženje stiče svojstvo pravnog lica i ima slobodu djelovanja na cijelom području Bosne i Hercegovine isključivo pod registrovanim nazivom.
4. Ciljevi i djelatnosti Udruženja su: akademski i strukovni razvoj iz oblasti upravljanja, sigurnosti, inovacija i revizije informacionih sistema (u daljem tekstu: IT profesije) u Bosni i Hercegovini; rad na razvoju, unaprjeđivanju, uspostavljanju i održavanju praksi vezanih uz IT profesiju; organiziranje svih vidova akademskih i strukovnih edukacija, specijalističkih obuka i stručnih provjera za sticanje različitih zvanja vezanih za IT profesiju; promovisanje naučnih oblasti IT profesije; povezivanje i saradnja akademskih stručnjaka i stručnjaka iz prakse koji rade na područjima IT profesije, kao i drugim povezanim područjima; organiziranje savjetovanja i drugih naučnih i stručnih skupova na teme iz oblasti IT profesije, te i drugih srodnih područja; izdavanje akademskih i stručnih publikacija u skladu sa Zakonom; saradnja sa nadležnim organima, tijelima i organizacijama u Bosni i Hercegovini u cilju unaprjeđenja, razvoja i zaštite IT profesije; promovisanje značaja i ugleda IT profesije; ostvarivanje saradnje sa drugim srodnim asocijacijama u zemlji i inostranstvu.

Udruženje se razvrstava za područje djelovanja: 13. Tehnička kultura i informacijske tehnologije.

5. Lica ovlaštena za zastupanje Udruženja u pravnom prometu su:

- Senad Džananović, predsjednik Udruženja i
- Amra Alagić, zamjenik predsjednika Udruženja.

6. U slučaju nastupanja promjena činjenica koje su upisane u Registar, Udruženje je dužno u skladu sa članom 43. stav 1. Zakona o udruženjima i fondacijama Bosne i Hercegovine podnijeti ovom Ministarstvu zahtjev za izmjenu i dopunu registracije, u roku od 30 dana od dana izvršene promjene.
7. Ovo Rješenje objavljuje se u „Službenom glasniku BiH“, o trošku podnosioca zahtjeva i na internetskoj stranici Ministarstva.

Obrazloženje

Osnivači Udruženja za digitalnu transformaciju u Bosni i Hercegovini su dana 05.12.2018. godine, putem ovlaštene osobe za podnošenje Zahtjeva za registraciju, podnijeli zahtjev za upis u Registar udruženja kod Ministarstva pravde Bosne i Hercegovine, na osnovu Zakona o udruženjima i fondacijama Bosne i Hercegovine, pod prvobitnim nazivom: *Društvo za upravljanje, sigurnost, inovacije i reviziju informacionih sistema u Bosni i Hercegovini*.

U toku postupka registracije, Ministarstvo je utvrdilo da zahtjev nije potpun, te da sadrži nedostatke i nepravilnosti zbog kojih nije moguće izvršiti registraciju. Ministarstvo je aktom Broj: UP09-07-1-2717/18 od 26.12.2018. godine zatražilo ispravku i dopunu zahtjeva.

Podnosilac zahtjeva je podneskom od 21.01.2019. godine izvršio izmjene i dopune zahtjeva, te je uz zahtjev za upis u Registar udruženja priložio slijedeću dokumentaciju: Zapisnik sa Osnivačke skupštine Udruženja, Broj:1/18 od 30.11.2018. godine; dokaz o upisu osnivača: Ekonomski fakultet Sarajevo u Sudski registar Općinskog suda u Sarajevu, *Rješenje o izmjenama podataka*, Broj: 065-0-Reg-18-005391 od 19.11.2018. godine; Odluku Ekonomskog fakulteta u Sarajevu, Broj: 01-3-7563/18 od 28.12.2018. godine; Odluku o osnivanju Udruženja, Broj:2/18 od 30.11.2018. godine; Izjavu podnosioca zahtjeva, Ovjera broj: 986 od 17.01.2019. godine; prijevod naziva Udruženja od stalnog sudskog tumača za engleski jezik, Elezović Staše od 17.01.2019. godine; dva primjerka Statuta Udruženja, Broj: 4/14 od 30.11.2018. godine; Odluku o imenovanju predsjednika Skupštine Udruženja, Broj: 3/18 od 30.11.2018. godine; Odluku o imenovanju predsjednika i zamjenika predsjednika Udruženja, Broj: 5/18 od 30.11.2018. godine; Odluku o imenovanju sekretara Udruženja, Broj: 6/18 od 30.11.2018. godine; Odluku o imenovanju lica ovlaštenih za zastupanje Udruženja u pravnom prometu, Broj: 7/18 od 30.11.2018. godine, kao i ovjerene vlastoručne potpise imenovanih lica; Odluku o imenovanju članova Upravnog odbora Udruženja, Broj: 8/18 od 30.11.2018. godine; otisak i opis znaka Udruženja na posebnom prilogu zahtjeva, te ovjerene fotokopije ličnih karata osnivača Udruženja.

Na osnovu činjenica utvrđenih u postupku, proizilazi da su ispunjeni uslovi predviđeni Zakonom o udruženjima i fondacijama Bosne i Hercegovine i Pravilnikom o načinu vođenja registra udruženja i fondacija Bosne i Hercegovine i stranih i međunarodnih udruženja i fondacija i drugih neprofitnih organizacija za upis Udruženja za digitalnu transformaciju u Bosni i Hercegovini u Registar udruženja kod Ministarstva pravde BiH, pa je doneseno rješenje kao u dispozitivu.

Na ovo Rješenje naplaćena je administrativna taksa u iznosu od 200,00 KM u skladu sa TAR.Brojem 108. Odluke o dopuni tarife administrativnih taksi, („Službeni glasnik BiH“ broj: 73/17).

Pouka o pravnom lijeku:

Protiv ovog rješenja nije dopuštena žalba, ali se može pokrenuti upravni spor tužbom pred Sudom Bosne i Hercegovine. Rok za podnošenje tužbe je 60 dana od dana prijema ovog rješenja.

Dostavljeno:

- Senad Džananović (za Udruženje za digitalnu transformaciju u Bosni i Hercegovini), ulica Breka broj 40, 71 000 SARAJEVO i ovjeren primjerak Statuta Udruženja, Broj: 4/14 od 30.11.2018. godine;
- Zbirka isprava;
- JP NIO "Službeni list BiH".

